

LA QUOTIDIANA

FMR Fundaziun Medias Rumantschas, Via da Masans 2, 7000 Cuira, 081 544 89 11, redacziun@fmr.ch



Preschantà il mulin renovà

Dapi l'atun passà è il «Mulign da Tarasp» renovà. Quel vegn ussa demonstrà a chaschun da guidas.

Pagina 6



Impressiuns dal curs da rumantsch

Durant duas emnas han pli che 140 persunas fatg a Glion in bogn – en l'idiom sursilvan.

Pagina 5

FMR FUNDAZIUN
MEDIAS
RUMANTSCHAS

südostschweiz

GRISCHUN

Nova carta dal di è disputaivla

Davent da l'onn 2024 datti midadas cun la spierta da la carta dal di da las vischnancas. La carta dal di per il traffic public che custava enfin qua tranter 40 e 45 francs na datti betg pli sco carta dal di per ina pauschala. Tar la nova carta dal di datti ina differenza da pretsch tranter cun u senza abunament da mesa taxa. Ed er da nov pon ins cumprar la carta dal di sco carta d'emprima u da segunda classa. La nova carta dal di chaschuna discussiuns surtut tar las vischnancas. Las vischnancas grischunas che la FMR ha dumandà prevesan d'introducir la nova carta dal di. Ellas n'èn dentant betg fieus e flomma per la nova purschida. (fmr/mg)

Pagina 2

SURSELVA

Tgei fagess il turisticcher?



Il pavigliun historic dil Hotel dil Parc.

FOTO AUGUSTIN BEELI

Gievgia eis ei vegniu enconuschent ch'il Hotel dil Parc a Flem hagi difficultads. La possessura ei lunsch naven dil liug d'acziun. Per la destinaziun da Flem Laax Falera e la regiun ei il hotel da luxus in segment impurtont dalla purschida turistica. La vischnaunca da Flem ha priu posiziun vendergis vargau. Impurtont seigi ch'ins fetschi buca speculaziuns e ch'il possessur porschi maun per discuors sincers e constructivs, scriva il president communal *Martin Hug*. Tut che deplorescha la situaziun, denton concretamein ha mo la proprietaria americana da decider en caussa. Tgei fagess in turisticcher indigen cun liunga experientscha en quella situaziun? La FMR ha dumandau *Marcel Friberg*. Il turisticcher da Breil ei cussegliader d'interpresas ed involvaus en projects da ressorts el Grischun ed auters cantuns. Tenor Marcel Friberg sto il Hotel dil Parc restar ina casa da tschun steilas. (fmr/abc)

Pagina 3

GRISCHUN CENTRAL

Tgitar migler igls commembers

En surple da sorteidas da passa 20 000 francs – uscheia sera igl chint annual 2022 da Lai Turissem. Scu tg'è sa musso alla radunanza generala dall'organisaziun strategica dalla regiun da vacanzas igl venderde passo, dattigl ples raschungs persiva: Las aczias tgi Lai Turissem ò tar la Bogn Alvagni SA chellas èn neidas stritgeidas digl tottafatg sen en import da nolla. E las var 3000 aczias da Lai Pendericularas chellas èn neidas scretgas giu sen diesch francs per aczia e figureschan aint igl chint annual cun en minus da 18 690 francs. Igl interess digls 301 commembers – per gronda part giasts dalla regiun da Lai – per la radunanza generala è pitost sto maier. Dalla vart dalla cumischung da gestiun è nia detg tgi Lai Turissem vegia urgent da tgitar pi bagn igls sies commembers. (fmr/gns/sab)

Pagina 8



9 771424 749004

1 003 1



Servetsch d'abunents e da distribuziun: tel. 0844 226 226 mail: abo@somedia.ch

Ellas sun üna runda inavaunt

La squedra naziunela da ballapè da duonnas svizra es riveda her, dumengia üna runda inavaunt tals champiunedis mundiels da ballapè in Australia e Nouva Zelanda. Traunter oter eir cun sustegn engiadinais da la terza goalie Seraina Friedli, chi s'ho piglieda il temp per ün'intervista cun la FMR.

MARTIN CAMICHEL/FMR

Daspö bundant trais eivnas es la squedra naziunela da ballapè svizra in Nouva Zelanda als champiunedis mundiels da ballapè da duonnas. Cun ün nolla a nolla cunter il co-osp, la Nouva Zelanda, s'haun las duonnas qualifichedas in dumengia pel ochevelfinel. Part da la delegaziun svizra fo eir la terza goalie *Seraina Friedli*, chi'd es creschida sü a La Punt Chamues-ch. Per ella es que la prüma vouta ad ün

«Da gnir a chesa cun üna medaglia saro schont difficil, ma insomma na impussibel.»

Seraina Friedli, terza goalie da la squedra naziunela da ballapè svizra

champiunedi mundiel. Ma fin uossa nun es la goalie engiadinaisa auncha steda in acziun in Nouva Zelanda. In ün'intervista cun la FMR ho Seraina Friedli quinto davart ils prüms gös ch'ella ho observo dal baunch oura. «Da gnir a chesa cun üna medaglia saro schont difficil, ma insomma na impussibel», disch Seraina Friedli. Tenor ella paun las duonnas svizras però esser cuntaintas cun lur prestaziun fin uossa.

Pagina 7

«Sedamondel magari, schebein il cantun less buc impunder dapli che sis milliuns per l'infrastructura turistica enstagl da 120 milliuns per vias?»

Marcel Friberg, turisticcher ed anteriur president da Grischun Vacanzas – Pagina 3



FOTO DANIELA DERUNGS

Cun vesta sil Péz Regina

Sonda ha la Pro Lumerins festivau la reuniun dil «Sulegl dil Péz Regina» culla «Steila dils quater vents» (foto). Aschia senumnan ils dus cristagls gigants che Alfons Derungs permier e *Michael Flepp* havevan priu or dil fuorn al Péz Regina. Cu els han finiu ina lavur stentusa da quater onns, ha in'autra historia entschiet. 15 milliuns onns eran ils schumellins stai conservai en in cuvel dil péz. Suenter 20 onns ein omisdus definitivamein a Lumbrein. In ha ussa vesta directa sil Péz Regina. (fmr/abc)

Pagina 3



Il president dalla Pro Lumerins, Ramun Capaul, ha astgau beneventar bia glied all'inauguraziun dil local d'exposiziun.



Olga Schreiner ha retschiert dalla Pro Lumerins ina gruppina miniatura, ord il medem fuorn sco quel dils dus schumellins.



Michael Flepp contempla sia Steila dils quater vents. La gruppina ei ussa en in liug representativ a Lumbrin.

FOTOS DANIELA DERUNGS

Fiasta pil retuorn «en patria»

Duront 15 milliuns onns ein els carschi e stai in sper l'auter el fuorn dil Péz Regina. Lu han ils cavacristallas Alfons Derungs permier e Michael Flepp priu ora e menau a val ils gigants. Duront 20 onns ein ils dus cristagls da mintgamai ina tonna stai separai in da l'auter. L'uniun Pro Lumerins ha contonschiu ch'els retuornien. E quei han ils da Lumbrin festivau sonda vargada.

AUGUSTIN BEELI/FMR

«Adia alpetta, jeu lasch tei suletta, e prendel cumiau. Adia collina, ti spunda alpina, miu liug desiderau»: cun ina canzun cun quels plaid ha *Astrid Alexandre* aviert l'occurrenza sut l'ustria Lumerina a Lumbrin.

La musicista e cantautura ha enramau sonda la fiastetta da beinvegni pils dus cristagls ch'ei uss uni. Els sesanflan buca el medem local. Fertun ch'il «Sulegl dil Péz Regina» ei exponius el plaunterren dalla Casa d'Angel, ei la «Steila dils quater vents» rodund 100 meters pli anen encunter il vitg. A la fin ha Astrid Alexandre dau la rama ideala all'occurrenza: «O tgei gust da viagiare. Mo aunc pli bi da returnar», ha ella cantau.

Harregiau

La Steila dils quater vents, la secunda gruppina da cristagls gigants, ei ussa returnada. Grazia alla fundaziun SKKG da Winterthur ei la reuniun gartegiada – e quei han ils da Lumbrin vuliu festivar. Igl onn 2010 ha la Pro Lumerins saviu contonscher l'emprema finamira. Quater onns avon havevan *Anita Capaul* e *Ramun Capaul*, *Gian Derungs* ed *Elmar Collenberg*, susteni d'ulteriurs adherents dall'idea, fundau l'uniun. Intent principal dueigi la cultura lumerina esser, en special veglien ins procurar che las duas gruppas da cristagls dil Péz Regina retuornien a Lumbrin. Cun agid dall'anteriura vischnaunca da Lumbrin, dall'uniun turistica e sponsurs eis ei gartegiau da cumprar il «Sulegl dil Péz Regina». Il cristagl gigant d'Alfons De-

rungs permier era staus dapi 2003 sin via di, denter auter all'exposiziun mundiala el Japan. Alla fin eis el returnaus en in liug pli idillic, ella Casa d'Angel a Lumbrin.

Buca lunsch naven ei ussa la Steila dils quater vents. Co igl ei gartegiau d'organisar e pussibilitar il retuorn dalla secunda gruppina ha Anita Capaul resumau cuortamein: «Harregiar ei quei che munta», ha ella getg el discurs d'*Anton Capaul* cun ella e *Michael Flepp*. Il cavacristallas ed emprem possessor, aveva dau a sia gruppina il num e schau ir quella sin via di per l'Europa entuorn ed en Svizra. Mintga gada era ei stau in veritabel project cumbinaus cun rescas e cuosts. La finala ei la «Steila» setschentada ella collecziun dalla fundaziun SKKG da Winterthur. Cu la Pro Lumerins ha intervegniu quei ein dus

commembers, Gian Derungs ed Elmar Collenberg, vegni activs. Els savevan co ei seigi cul secund cristagl gigant ed han buca schau luc. «A nus ha quella stinadada, quella perseveranza e pazienza fatg impressiun», ha *Olga Schreiner*, la restauratura dalla fundaziun SKKG, getg en siu plaid.

Cun vesta sil liug dall'anflada

Alla raspada ch'ei serimnada sonda suentermeizgi avon la casa dall'ustria lumerina ha Olga Schreiner raquintau co gl'impresari *Bruno Stefanini* era vegnius rehs cun immobilias e co el ha entschiet a rimnar e cumprar, bunamein a moda obsessiva. Cun differents pass e mesiras, era grazia a circumstanzias idealas dil liug a Lumbrin, eis ei gartegiau alla Pro Lumerins da fixar

ina cunvegna d'emprest durabel culla fundaziun SKKG. «Che quei object era depognius nunvengonzamein, senza saver semanifestar e s'exprimer, en in tschaler sutterran plascheva buca a nus», ha Olga Schreiner tradiu. Per quei seigi la fundaziun ussa fetg leda e satisfatga ch'els da Lumbrin hagen preparau aposta per el in liug dign. Il local d'exposiziun ei egl emprem plaun sut d'ina casa-lenn tipica en construcziun da stric. Els da Lumbrin enconuschan il local sco la «stizun d'Imelda». Cunfinada encunter la via principala d'in iert envida la casa da visitar la «Steila dils quater vents». Dil reminent havevan Michael Flepp ed Alfons Derungs, senza saver ei, entschiet a cavar il fuorn ella vischinonza d'in liug cul num local Plaun da cristagls. Cun raschun han ils perdavonts dau quei num.